

先代舊事本紀卷第九

帝皇本紀

繼體天皇。

諱-男大跡天皇,更名彥太尊者,譽田天皇五世孫,彥主人王之子也。母曰-振媛,活目天皇七世之孫也。天皇父聞振媛顏容殊妙甚有媿色,自近江國高嶋郡三尾之別業,遣使聘于三國坂名井,納以為妃,遂產天皇。

天皇幼年,父王薨。振媛迺歎曰:「妾今遠離桑梓,安得膝養?余歸寧高向,高向者,越前國邑名。奉養天皇。」天皇壯大,愛士禮賢,意豁如也。

小泊瀨天皇八年冬十二月,己亥,崩。元無男女,可絕繼嗣。

大伴金村大連議曰:「方今絕無繼嗣,天下何所繫心?自古迄今,禍由斯起!今足仲彥天皇五世孫-倭彥王,在丹波國桑田郡。請試設兵仗,夾衛乘輿,就而奉迎,立為人主!」大臣・大連等,一皆隨焉,奉迎如計。

於是,倭彥王遙望迎兵,愕然失色,仍遁山壑,不知所詣。

元年歲次丁亥春正月,辛酉朔甲子,大伴金村大連更籌議曰:「男大跡王,性慈仁孝順,可承天緒;冀懇勸進,紹隆帝業矣!」物部麤鹿火大連・許勢男人大臣等僉曰:「妙簡孫,賢者唯男大跡王矣!」

丙寅,遣臣連等,持節以備法駕,奉迎三國。夾衛兵仗,肅整容儀,警蹕前驅,奄然而至。

於是,男大跡天皇晏然自若,踞坐胡床。齊列陪臣,既如帝坐。持節使等由是敬憚,傾心委命,冀盡忠誠。然天皇意裏尚疑,久而不就。

適知河內馬飼首荒籠,密奉遣使,具述大臣・大連等所以奉迎本意。留二日三夜遂發,乃喟然而歎曰:「懿哉,馬飼首!汝若無遣使來告,殆取嗤於天下!世云:『勿論貴賤,唯重其心。』蓋謂荒籠乎!」及至踐祚,厚加寵待也。

甲申,天皇行至樟葉宮。

二月,辛卯朔甲午,大伴金村大連乃跪上天子鏡・劍璽符再拜。

男大跡天皇謝曰:「子民治國,重事也。寡人不才,不足稱。願請迴慮擇賢者,寡人不敢當。」大伴大連伏地固請,男大跡天皇西向讓者三,南向讓者再。大伴大連等皆曰:「伏計之,大王子民治國,最宜稱!臣等為宗廟社稷,計不敢忽。幸籍眾願,乞垂聽納矣!」男大跡天皇曰:「大臣・大連・將・相・諸臣,咸推寡人,不敢乖之。乖,原本作承,據書紀改之。」乃受璽符也。

是日,即天皇位。尊皇妃,立為-皇太夫人媛也。

庚子,大伴大連奏請曰:「臣聞,前王之宰世也,非維城之固,無以鎮其乾坤;非掖庭之親,無以繼其跌尊。是故,白髮天皇無嗣,遣臣祖父大伴大連室屋,每州安置三種白髮部,以留後世之名。日本紀云,言三種者:一白髮部舍人,二白髮部供膳,三白髮部鞠負也。嗟夫,可不愴歎!請納手白香皇女,立為皇后,復遣神祇伯等,敬祭神祇,求天皇息,允答民望!」天皇曰:「可矣。」

三月,庚申朔,詔曰:「神祇不可乏主,宇宙不可無君。天生黎庶,樹以元首,使司助養,令全性命。大連憂朕無息,披誠款,以國家,世世盡忠,豈唯朕歟?宜備禮儀,奉迎手白香皇女!」

甲子,立皇后-手白香皇女,脩教于內,遂生一男。

謂,天國排開廣庭尊,即嫡子也。而幼年於二兄治後,有其天下矣。兄,廣國排武金日尊,次,武小廣國押盾尊。

癸酉,納八妃。納八妃,雖有先後,而此曰癸酉納者,據即天位,占擇良日,初拜後宮,為文。他皆效此矣。

元妃,尾張連草香女,曰-日子媛,生二子矣。

兄,勾大兄皇子。謂-廣國排武金日尊。

次,檜隈高田皇子。謂-武小廣國押盾尊。

次妃,三尾角折君妹,曰-稚子媛,生一男一女。

大郎皇子與出雲皇女。

次,坂田大跨王女-廣媛,生三女。

神前皇女。

次,茨田皇女。

次,馬來田皇女。

次,息長真手王女-麻績娘子,生一女。

荳角皇女,伊勢太神齋祠。

次,茨田連小望女,曰-關媛,生三女。

茨田大娘皇女。

次,白坂活日姬皇女。

次,小野稚娘皇女。

次,三尾君堅槭女,曰-倭媛,生二男二女。

第一,大娘子皇女。

次,椀子皇子。

次,耳皇子。

次,赤姬皇女。

次,和珥臣河內女,曰-黃媛,生一男二女。

第一,稚綾姬皇女。

次,圓姬皇女。

次,厚皇子。

次,根王女,曰-廣媛,生二男。

兄,菟皇子.
次,中皇子.

二年冬十月,辛亥朔癸丑,葬小泊瀨稚鷯天皇于傍丘磐坏丘陵.

五年冬十月,都遷山背,謂-筒城宮.

八年春正月,詔曰:「勾大兄皇子宜處春宮,助朕施仁,翼吾補闕之矣.」詔曰二字,原本無.

二十五年春二月,天皇病苦.

丁未,崩于磐余玉穗宮,年八十二.

冬十二月,丙申朔庚子,葬于藍野陵.

天皇所生,八男十二女,明上文,更亦勿記.

子,天國排開廣庭尊.

兄,勾大兄廣國排武金日尊.

次,檜隈高田武小廣國押盾尊.

次,大郎皇子.

次,出雲皇女.

次,神前皇女.

次,茨田皇女.

次,馬來田皇女.

次,荳角皇女.伊勢太神齋祠.

次,茨田大郎娘皇女.

次,白坂活日姬皇女.

次,小野稚郎皇女.

次,大娘子皇女.

次,椀子皇子.三國公祖.

次,耳皇子.

次,赤姬皇女.

次,稚綾姬皇女.

次,圓媛皇女.

次,厚皇子.

次,菟皇子.酒人公祖.

次,中皇子.坂田公祖.

安閑天皇.

諱-廣國押武金日尊者,男大跡天皇長子也.母曰-日子媛.即尾張連草香之女也.

天皇為性墻宇窳岐,不可得窺.桓桓寬大,有人君之量矣.

廿五年春二月,辛丑朔丁未,男大跡天皇立大兄為天皇矣.

則是日,男大跡天皇崩.

元年歲次甲寅春正月,都遷倭勾,謂-金橋宮.

三月,癸未朔戊子,有司為天皇位,位字恐衍文.納采春日山田皇女為-皇后.更名-山田赤見皇女,億計天皇之皇女也.

別立三妃:立許勢男人大臣女-紗手媛,紗手媛弟-香香有媛,物部木蓮子-木蓮子大連女-宅媛矣.

二年冬十二月,癸酉朔己丑,天皇崩于勾金橋宮,年七十.

是月,葬天皇於河內古市高屋丘陵.皇后-春日山田皇女及天皇妹-神前皇女,合葬于是陵之也.

天皇無胤.

宣化天皇.

諱-武小廣國押盾尊者,男大跡天皇第二子也,勾大兄廣國押武金日天皇之同母弟也.

二年十二月,勾大兄廣國押武金日天皇崩,無嗣.群臣奏上鏡・劍於武小廣國押盾尊,使即天皇之位焉.

天皇為人,器宇清通,神襟朗明.不以才智矜人為王,君子所服也.

元年春正月,都遷檜前,謂-廬入野宮.

三月,壬寅朔,有司請立皇后.

己酉,詔曰:「前正妃億計天皇女-橘仲皇女立為皇后.」誕生一男三女.

長曰,石姬皇女.

次,小石姬皇女.

次,稚綾姬皇女.

次,上殖葉皇子,亦名-椀子.

前庶妃-大河內稚子媛.

生,火焰皇子.

四年春二月,乙酉朔甲午,天皇崩于廬入野宮,年七十三.

冬十一月,庚戌朔丙寅,葬于大倭國身狹桃花鳥坂上陵.以皇后-橘皇女及其孺子,合葬于是陵也.孺子者,蓋未成人而薨歟.

天皇所生,二男三女.

兄,石姬皇女.

次,小石姬皇女.

次,稚綾姬皇女.

次,上殖葉皇子.亦名-梔子.丹比・稚田君祖.

次,火焰皇子.倭那君祖.

欽明天皇.

諱-天國排開廣庭尊者,男大跡天皇嫡子也.母曰-皇后-手白香皇女也.天皇愛之,常置左右.

天皇幼時夢,有人云:「天皇寵愛秦天津父者,及壯大,必有天下!」寐驚,遣使普覓,得自山背國紀伊郡深草里.姓字果如前夢.於是欣喜遍身,歎未曾夢.

乃告之曰:「汝有何事?」答云:「無也.但臣向伊勢商價來還,山逢二狼相鬥汗血.乃下馬洗漱口手,祈請曰:『汝是貴神,而樂麤行.儻逢狩士,見禽尤速!』乃抑止相鬥,拭洗血毛,遂遣放之,俱令全命矣.」天皇曰:「此必報也!」乃令近侍,優寵日新,大致饒富.及至踐祚,拜大藏卿.

武小廣國押盾天皇四年冬十月,天皇崩.天國排開廣庭皇子尊令群臣曰:「余幼年淺識,未閑政事.山田皇后明閑百揆,請託而決!」山田皇后愴謝曰:「妾蒙恩寵,山河詎同.萬機之難,婦女安預?今皇子者,敬老慈少,禮下賢者,日中不食以待士.加以幼而穎脫,早擅嘉聲,性是寬和,務存矜宥.請諸臣等,早令臨登位,光臨天下矣.」

十二月,庚辰朔甲申,皇太子尊,即天皇位.尊皇后曰-皇太后.追皇太后贈-太皇太后.物部尾輿連公為大連,物部目連公為大臣.

元年春正月,庚戌朔甲子,有司請立皇后.

詔曰:「立正妃,武小廣國押盾天皇女-石姬為皇后.」誕生二男一女.

長曰,箭田珠勝大兄皇子.

次曰,譯語田淳中倉太珠敷尊.

少曰,笠縫皇女.更名,狹田毛皇女.

秋七月,丙子朔己丑,都遷磯城,謂-金刺宮.

三年春二月,納五妃.書紀作-二年春三月.

元妃,皇后弟,曰-稚綾姬皇女,生一男.

石上皇子.

次妃,皇后弟-日影皇女.

生,倉皇子.

次妃,堅鹽媛,生七男六女.蘇我大臣稻目宿禰女也.

一曰,大兄皇子.謂-橘豐日尊.

二曰,磐隈皇女.亦名-夢皇女.初侍天照太神祠,後坐姦茨城皇子.

三曰,臘嘴鳥皇子.

四曰,豐御食炊屋姬尊.

五曰,梔子皇子.

六曰,大宅皇女.或本作-皇子.

七曰,石上部皇子.

八曰,山背皇子.

九曰,大伴皇子.或本作-皇女.

十曰,櫻井皇子.

十一曰,肩野皇女.

十二曰,橘本稚皇子.

十三曰,舍人皇女.

次妃,堅鹽姬同母弟-小姊君,生四男一女.

一曰,茨城皇子.

二曰,葛城皇子.

三曰,渥部穴穗部皇女.

四曰,渥部穴穗皇女.書記作-渥部穴穗部皇子.

五曰,泊瀨部皇子.

十五年春正月,戊子朔甲午,淳中倉太珠敷尊立為皇太子.

三十二年夏四月,戊寅朔壬辰,天皇寢疾不豫.皇太子向外不在,驛馬召到,引入臥內.執其手詔曰:「朕疾甚,以後事屬汝.汝須打新羅,封建任那.更造夫婦,惟如舊日,死矣無恨.」日本紀云,天皇二十三年,任那維新羅所滅.」

是月,天皇遂崩于內寢.時年若干.

五月,殯于河內古市.

九月,葬於檜隈坂合陵.

天皇所生皇子廿三之中,男十五女八.云云

敏達天皇。

諱-淳中倉太珠敷尊者,天國排開廣庭天皇第二子也。母曰-石姬皇后,武小廣國押盾天皇女也。

天皇不信佛法,而愛文史矣。

二十九年,立為皇太子。

三十二年四月,天國排開廣庭天皇崩。

元年歲次壬辰夏四月,壬申朔甲戌,皇太子尊即天皇位。尊皇后曰-皇太后。追皇太后,贈-太皇太后。物部大市御狩連公為大連。

四年春正月,丙辰朔甲子,立廣姬為皇后,生一男二女。息長真手王之女也。

一曰,押坂彥人大兄皇子,更名-麻呂子皇子。

二曰,逆登皇女。

三曰,菟道磯津貝皇女。

次,春日臣-仲君女,曰-老女子,立為夫人,生三男一女。

一曰,難波皇子。

二曰,春日皇子。

三曰,桑田皇女。

四曰,大派皇子。

次,采女伊勢大鹿首小熊女,曰-菟名子夫人,生二女。

長曰,太娘皇女,更名-櫻井皇女。

少曰,糠手姬皇女,更名-田村皇女。

是歲,命卜者,占海部王家地與絲井王家地。卜便襲吉。遂營宮於譯語田。謂-幸玉宮。

五年春三月,己卯朔戊子,有司請立皇后。

詔豐御食炊屋姬尊立為皇后,生二男五女。

其一曰,菟道貝鮪皇女,嫁東宮聖德太子尊。

二曰,竹田皇子。

三曰,小墾田皇女,嫁於彥人大兄王。

四曰,鷗鷺守皇女,更名-輕守皇女。

五曰,尾張皇子。

六曰,田眼皇女,嫁息長足日廣額天皇。

七曰,櫻井弓張皇女。

十四年秋八月,乙酉朔己亥,天皇崩于大殿。葬殯。

天皇所生皇子,男八女七。云云。

用明天皇。

諱-橘豐日尊者,天國排開廣庭天皇第四之子也。母曰-皇后-堅鹽媛。

天皇信佛法,尊神道。

十四年秋八月,淳中倉太珠敷天皇崩。

九月,甲寅朔戊午,天皇即天皇位。都於磐余,謂-池邊雙槻宮。物部弓削守屋連公為大連,亦為大臣。

元年歲次丙午。春正月,壬子朔,穴穗部間人皇女立為皇后,生四男。

其一曰,廢戶皇子,更名-豐聰耳聖德皇子,或名-豐聰耳法大王,亦名-法主王。初居上宮,後移斑鳩。於豐御食炊屋姬天皇世,位居東宮,總攝萬機,行天皇事。語見豐御食炊屋姬天皇紀。

二曰,來目皇子。

三曰,殖粟皇子。

四曰,茨田皇子。

立,蘇我大臣稻目宿禰女-石寸名為嬪,生一男。

田目皇子,更名-豐浦皇子。

葛城直磐村女-廣子,生一男一女。

男曰,麻呂子皇子,當麻公祖。

女曰,酢香手姬皇女。

二年夏四月,乙巳朔丙午,御新嘗於磐余河上。

是日,天皇得病,還入於宮,群臣侍焉。

天皇詔群臣曰:「朕思欲歸三寶,卿等議之!」群臣入朝而議。

物部守屋大連與中臣勝海連,違詔議曰:「何背國神,敬他神也?由來,不識若斯事矣!」蘇我馬子宿禰大臣曰:「可隨詔而奉助!詎生異計矣。」

癸丑,天皇崩于大殿。

秋七月,甲戌朔甲午,葬于磐余池上陵。

天皇所生皇子七,六男一女。

崇峻天皇。

諱-泊瀨部天皇，天國排開廣庭天皇第十五子也。書紀作-十二子也。母曰-小姊君。稻目宿禰之女也。

二年夏四月，癸丑，橘豐日天皇崩。于時穴穗部皇子等謀反矣。

秋八月，癸卯朔甲辰，炊屋姬尊與群臣，勸進天皇，即天皇之位。

是月，宮於倉橋。

元年戊申春三月，立大伴糠手連女-小手子為妃，生一男一女。

蜂子皇子。

次，錦代皇女。

四年夏四月，壬子朔甲子，葬譯語田天皇於磯長陵，是其妣皇后所葬之陵也。

五年冬十月，癸酉朔丙子，有獻山豬。天皇指豬詔曰：「何時如斷此豬之頸，斷朕所嫌之人！」多設兵仗，有異於常矣。

大伴嬪小手子恨寵之衰，使人於蘇我馬子宿禰曰：「頃者，有獻山豬矣。天皇指豬而詔曰：『如斷豬頸，何時斷朕思人？』且於內裏大發兵仗。」於是馬子宿禰聽而驚矣。

壬午，蘇我馬子宿禰聞天皇所詔，恐嫌於己，招聚儻者，謀弑天皇。

十一月，癸卯朔乙巳，馬子宿禰詐於群臣曰：「今日進東國之調。」使東漢直駒，弑于天皇矣。

是日，葬天皇于倉梯岡陵。云云。

推古天皇。

諱-豐御食炊屋姬尊者，天國排開廣庭天皇女也，橘豐日天皇同母妹也。

幼曰-額田部皇女，姿色壯麗，進止軌制。

年十八，淳中倉太玉敷天皇立為皇后。

三十四年，淳中倉太珠敷天皇崩。

三十九年，當于泊瀨部天皇五年十一月，天皇為大臣馬子宿禰見弑，嗣位既空。

群臣請淳中倉太珠敷天皇之皇后-額田部皇女，以將令踐祚。皇后辭讓。百寮上表勸進，至于三乃從之。因以奉天皇之璽印矣。

冬十二月，壬申朔己卯，皇后即天皇位於豐浦宮。

元年夏四月，庚午朔己卯，立廢戶豐聰耳皇子為皇太子。仍錄攝政，以萬機悉委矣。

橘豐日天皇第二子也，母皇后-穴穗部間人皇女。皇后懷妊開胎之日，巡行禁中監諸司。至于馬官，乃當廢戶而不勞忽產之。

生而能言，有聖智。及壯，一聞十人訴，以勿失能辨，兼知未然。且習內教於高麗僧-慧慈，學外典於博士-覺芻，並悉達矣。父天皇愛之，令居宮南上殿。故稱其名，謂-上宮廢戶豐聰耳太子矣。

秋九月，改葬橘豐日天皇於河內磯長陵。

二年春三月，丙寅朔，詔皇太子及大臣，令興隆三寶。三月，書紀作-二月。

是時諸臣連等，各為君親之恩，競造佛舍。即是謂-寺焉。

九年春二月，皇太子初興宮室于斑鳩。

十一年十二月，戊辰朔壬申，始制冠位十二階，各有差。

十二年春正月，戊戌朔，始賜冠位於諸臣，各有差。

夏四月，丙寅朔戊辰，皇太子親筆作憲法十七條。別在日記。

十三年冬十月，皇太子居斑鳩宮。

十五年秋七月，戊申朔庚戌，大禮-小野臣妹子遣於大唐，以鞍作福利為通事。此遣唐使之始也。

十六年夏四月，小野妹子至自大唐國。號妹子臣曰-蘇因高。即大唐使人-裴世清。下客十二人，從妹子臣至於筑紫。語在別記。

秋九月，辛未朔辛巳，唐客-裴世清罷歸。

則須復以大仁-小野妹子臣為大使，小仁-吉志雄成為小使，小禮-福利為通事，副于唐客而遣之。

物部鎌足姬大刀自連公為參政。

十七年秋九月，小野臣妹子等至自大唐。

二十年春二月，辛亥朔庚午，改葬皇大夫人-堅鹽媛於檜隈大陵。

是日，誅於輕街：

第一，阿倍內臣-鳥，誅天皇之命，則奠靈。明器・明衣類，萬五千種也。

第二，諸皇子等，以次第各誅之。

第三，中臣宮地連-烏摩呂，誅大臣之辭。

第四，大臣引率八腹臣等，便以境部臣-摩理勢，令誅氏姓之本矣。

時人云：「摩理勢・烏摩呂二人能誅，唯鳥臣不能誅矣。」

廿二年夏六月，丁卯朔己卯，詔大仁-矢田部御孀連公，改姓名-造。則遣大唐使，復大禮-犬上君御田鉏為小使而遣之。物部惠佐古連公為大連。

廿三年秋九月，矢田部造-御孀・犬上君御田鉏等，至自大唐矣。

廿七年冬月，壬戌朔甲子，冬字下有脫字，不明。制曰：「夫覓事君竭忠之臣者，實在崇優二親之子也。何者夫父者天

也,故順天謂孝矣.復君者日也,故孝經曰:『求之忠臣者,必在於孝子之門矣.』是孝道至矣,祥如零泉,辟猶春雨生長萬物.若逆此道者,遂為大禍.滅福之機,如鹽入水.總而言之,謂之道矣.別而名之,謂八義矣.所謂八義者,蓋謂-孝・悌・忠・仁・義・禮・智・信歟.復天・地・日・月・星辰・聖・賢・神・祇者,人倫所重也.其壽稱・官爵・福德・榮樂者,貧生所貴矣.可謂舉孝道而格榮祥,勤禮義而獲立身者,是故此准八義,宜制爵位.其孝者天也,紫冠為一.忠者日也,錦冠為二.仁者月也,繡冠為三.悌者星也,纒冠為四.義者辰也,緋冠為五.禮者勝也,深綠為六.智者賢也,淺綠為七.信者神也,深縹為八.祇者祇也,淺縹為九.其第者母也,因號立身,黃冠為十.自今已後,永為恆式.」

廿八年春二月,甲午朔甲辰,上宮廡戶豐聰耳皇太子命・大臣蘇我馬子宿禰,奉敕撰錄先代舊事天皇紀及國記,臣・連・伴造・國造・百八十部并公民等本紀也.

春三月,甲子朔,制曰:「奉為君后謂不忠者,亦為考妣稱不孝者,若不舉答而隱之者,同處其罪,重科刑法也.」

二十九年春二月,己丑朔癸巳,夜半,皇太子-上宮廡戶豐聰耳尊,薨于斑鳩宮.

是時,諸王・諸臣及天下百姓,悉共長老如失愛兒,而鹽酢之味在口不嘗;少幼如亡慈父,以哭泣之聲溢於行路.乃耕夫止耜,春女不杵.皆:「日月失耀,天地既崩!自今已後,誰將恃哉?」

是月,葬皇太子於磯長陵.

當此之時,高麗僧-慧慈聞上宮皇太子薨,以大悲之,為皇太子請僧而設齋.親說經之日,誓願曰:「於日本國府有聖人,曰-上宮豐聰耳皇子.固天攸縱,以玄聖之德生日本之國.苟貫三統,纂先聖之宏猷,恭敬三寶,救黎元之厄,實是大聖也!今太子既薨,我雖異國,心在斷金.其獨生之,有何益矣?我以來年二月五日必死矣!因以遇上宮太子於淨土,以共化眾生矣.」於是,慧慈當于期日而死矣.是以時人彼此共言:「其獨非上宮太子之聖,慧慈亦聖也!」

先代舊事本紀卷第九 終

[\[久遠の絆\]](#) [\[卷八\]](#) [\[卷十\]](#) [\[再臨詔\]](#)